





Faint, illegible text, likely bleed-through from the reverse side of the page.







Gedenck vnd Erinnerungs  
Predigt /

Von dem grausamen  
Gewitter / vnd schrecklichem  
Bewässer / damit Thüringen heimgesuchet  
worden / am Sonnabend vor Trinitatis in der  
Nacht / war der 29. May / dieses in se-  
henden 1613. Jahrs.

Behalten / vnd nunmehr mit particulari-  
teten vnd sonst in etwas vermehret / zu  
Jena den 2. Junij.

Von

J O H A N N E M A J O R E,  
der heiligen Schrift Doctore vnd Profes-  
sore, auch Pfarrherrn vnd Superintenden-  
ten daselbst.



Gedruckt im Jahr / 1614.











## TEXTVS.

**W**ES sollte zwar / Geliebte vnd  
Andächtige in Christo dem HERN / zu  
diesem mal vnd auff heutigen Predigtag /  
in vnserer gewöhnlichen Mosaischen Le-  
ction fortfahren / vnd auffer derselben nichts anders  
noch neues vornehmen vnd tractiren. Aber weil der  
HERR vnser Gott / der vns lehret was nützlich ist /  
vnd leitet vns auff den Weg den wir gehen / Esa. 48.  
v. 17. am verschienen Sonnabend in der Nacht / mit  
einer zuvor vnerhörten Wasser- vnd Sündfluth ein  
ding gethan in Israel / daß einem beyde Ohren gel-  
len / der es höret / 1. Samuel 3. v. 11. So wollen auch  
wir einen vngewöhnlichen Text für die Hand neh-  
men / vnd hieraus Gottes Werck vnd Wunder be-  
herzigen. Denselben lesen wir im Buch Hiob am 38.  
Capittel / da sich der HERR aus dem Wetter hören  
lesset / vnd saget :

**W**er ist der / der so fehlet in der Weiß-  
heit / vnd redet so mit vnverstand ?  
Gürte deine Lenden wie ein Mann / ich wil  
A ij dich



dich fragen/lehre mich. Bist du gewesen  
da der Schnee herkömpt? Oder hast du  
gesehen/wo der Hagel herkömpt? Die ich  
habe verhalten biß auff die Zeit der Trüb-  
sal/ vnd auff den Tag des Streits vnd  
Kriegs. Durch welchen Weg theilet sich  
das Liecht? Vnd auffsehret der Ostwind  
auff Erden? Wer hat dem Plazregen sei-  
nen Lauff außgetheilet/ vnd den weg dem  
Blitzen vnd Donner? Das es regnet auff's  
Land/ da niemand ist in der Wüsten/ da  
kein Mensch ist. Das erfüllet die Einöden  
vnd Bildniß/ vñ macht das Gras wäch-  
set. Wer ist des Regens Vater? Wer hat  
die Tropffen des Thawes gezeuget? Aus  
weß Leib ist das Eyß gegangen? Vnd wer  
hat den Reiffen vnter dem Himmel gezeu-  
get? Daß das Wasser verborgen wird wie  
vnter Steinen/ vnd die Tieffe oben geste-  
het. Kanst du die Bande der sieben Ster-  
ne



ne zusammen binden: oder das band des  
Orions aufflösen: Kanst du den Morgen-  
stern herfür bringē zu seiner zeit: oder den  
Wagen am Himmel vber seine Kinder füh-  
ren: Weissest du/wie der Himmel zu regie-  
ren ist: Oder kanst du in meistern auff Er-  
den: Kanst du deinen Doñer in der Wol-  
cken hoch herführen: Oder wird dich die  
Menge des Wassers verdecken: Kanst du  
die Blitzen außlassen/das sie hinfahren/  
vnd sprechen: Hie sind wir. Wer gibt die  
Weisheit ins verborgen: Wer gibt ver-  
ständige Gedancken: Wer ist so weise/der  
die Wolcken erzehlen köndte: Wer kan die  
Wasserschleuche am Himmel verstopffen:

Wenn der Staub begossen wird/das  
er zu hauff leufft/vnd die Klöf-  
se an einander  
fleben.



## Eine Predigt von dem Erklärung.

Exordium  
ab auctore  
horum ver-  
borum.

Occasio et  
orandum.

Finis.

**W**ie diese Wort/so viel derselben auff vnd nach  
einander an jeko ewer Liebe seyn vorgelesen worden/  
hat der Herrscher vnd Richter aller Welt/der Himmel  
vnd Erden besitzet/Gen. 14. v. 19. in eigener Person selber ge-  
redet/zum Hiob dem grossen Märtyrer vnd Kreuzträger/ihn  
hiermit zu examiniren/vnd von seinem Sinn abzuhalten/da-  
durch er sich versündiget/vnd thörllich wider Gott geredet  
vnd gethan hatte. Denn es waren seine drey Freunde/ein jeg-  
licher aus seinem Ort kommen / in dem grossen Unglück das  
ihn betroffen/ihn zu besuchen vnd zu trösten. Da sie nun an-  
gefangen mit ihm zu reden / gerathen sie an einander mit ei-  
ner scharffen vnd schweren Disputation/ob Hiob den vielfältis-  
gen grossen Jammer / so ihn betreten / mit seinen Sünden  
verdienet/vnd ob der heilige vnd allein mächtige Gott auch  
Ursach genungsam hette/ das er diesen Mann / der schlecht  
vnd gerecht war/so hefftig angrieffe. In welchem Disputat/  
wie offtermals in dergleichen Streit zu geschehen pfeget/auff  
einem Theil /so wol als auff dem andern / viel verweißliches  
vnd vngeschicktes dinges mit vnter gelauffen/bevorab in dem/  
das man den Abgrund der Weisheit Gottes erschöpfen/die  
Tiefe seiner Gerichte ergründen/vnd alle seine Wege vnd  
Anschläge ermessen vnd außrecken/vnd also hiermit Gott sel-  
ber zur Schule führen/vnd rechtfertigen wollen. Welchem  
irrigen vnd verwirretem Handel/vnd daraus erwachsenen  
inconuenientien abzuheiffen/gibt Gott / der alleinweise ist /  
Rom. 16. v. 27. lechlich einen Scheidemann / vnd fellet das  
Urtheil mehr auff Hiobs seiten/denn seiner Freunde/ fast des  
Aufschlages vnd Schlusses/ dergleichen auch Paulus nach  
voll.



## erschrecklichen Gewässer.

Vollführter seiner Disputation/von hindansetzung der Jüden/  
vnd Beruff der Heyden machet/Rom. 11. v. 33. O welch eine  
Tiefe des Reichthums / beyde der Weißheit vnnnd Erkent-  
niß Gottes? Wie gar unbegreiflich sind seine Gerichte/vnd  
vnerforschlich seine Wege? Denn wer hat des HErrn Sinn  
erkannt? Oder wer ist sein Rathgeber gewesen? Oder wer hat  
ihm etwas zuvor gegeben / das ihm werde wieder vergolten?  
Vnd Syrach ziele auch auff diesen Zweck im ersten Capittel  
v. 4. Wer hat Gott je gelehret was er machen sol? Denn seine  
Weißheit ist vor allen dingen. Ingleichem Esa. 40. v. 14. Wenn  
fraget der HErr vmb Rath der ihm Verstand gebe / vnd lehre  
ihm den Weg des Rechtes.

Ist demnach dieses der vorhabenden Wort eigentliche Summa &  
scopus.  
Meynung/Wenn man von Gott vnnnd seinem Thun/so er an  
den Menschen/wie auch an andern Creaturen sehen leset / wol-  
te recht vrtheilen/vnnnd vnerweißlich reden / So müsse man  
nicht die elende Vernunft des Menschen zur Magisterin vnd  
Lehrmeisterin aufstellen/noch sich mit Fleisch vnnnd Blut be-  
fragen/denn dadurch kömpt man je lenger je weiter auff frem-  
de Irrwege/fehret entweder zu hoch oder zu tieff / Rom. 10. v.  
7. Sondern man muß sich in kindlicher einfalt vnd Demuth  
halten an den Willen Gottes/den er vns in seinem Wort of-  
fenbahret/darinnen wir finden das unbegreiflich sey/wie Gott  
regiere/Psalm. 147. vnd seyen vns viel grösser Werck verbor-  
gen/denn wir sehen vnnnd erkennen / Syr. 43. Wir treffen das  
kaum das auff Erden ist/vnnnd erfinden schwerlich das vnter  
handen ist/wer wil denn erforschen was im Himmel ist. Der  
sterblichen Menschen Gedancken seynd mislich/vnd vnser an-  
schläge seynd fehrllich/Sapient. 9. v. 14. Solche Meynung Propositio  
Gottes aus dem abgelesenen Text mit mehrern einzuneh-  
men / Wollen wir die Fragen / so Gott dem Hiob auffgege-  
ben /



## Eine Predigt von dem

ben/ruminiren/vnnd in heiliger Andacht fürzlich durchwan-  
dern/Auch fürs andere/den fürnembsten Nutz vnd Gebrauch  
anzeigen/vnd hiernechst/auff vns vnd jetzigen zustand die Ap-  
plication machen. Der König der Ehren/so da donnert / vnd  
seine stimme hören lest auff den Wassern/Psalm/29. v.3. Der  
gebe seinem Donner Krafft/Psal. 68. v.34. vmb vnfers HEr-  
ren vnd Heylandes Jesu Christi willen / Amen.

Exergasie  
ab hypoth.  
transit.  
Ad thesina

Contra As-  
trologorū  
opiniones.

Quæ veræ  
& probanz  
dæ, quo ad  
temporum  
distinctio-  
nes.

**W**As der Lehrer von Gott in die Welt gesen-  
det/zu seinem Nachschüler Nicodemo saget / Joh. 3.  
v.8. Der Wind bläset wo er wil/vnnd du hörest sein  
fausen wol/aber du weißt nicht von wannen er kömmet / vnnd  
wohin er fehret/ Eben solches können wir auch von andern/  
vnd allermeist denen dingen sagen/die sich an vnnd vnter dem  
Himmel/oder in der Luft / entweder mit den Sternen oder  
mit Dünsten/Wolcken / Nebeln / Gewitter vnnd dergleichen  
meteoris begeben vnd gesehen werden. Denn obwol die fleis-  
sigen Naturkündiger / denen Gott Weißheit vnnd Verstand  
gegeben/das sie wissen die Krafft der Elementen / die Art der  
zamen vnd wilden Thier/vnnd wie das Jahr herum leuffet/  
vnd der Wind stürmet/Sap.7. v.20. sich hoch bemühen / na-  
türliche Ursachen am Himmel vnnd Gestirn zu erkündigen  
vnd vorzulegen/warumb es heut trüb / morgen schon Wet-  
ter geben/ieso kalt/bald warm seyn müsse / Item woher Land  
vnd Leuten gutes vnd böses/schaden vnd Heil/Krieg vnd frie-  
de/Thewrung vnd wolfeile zeiten / Wachsthum der Fruch-  
te vnd Verderben entstehe/So wollen doch ihre vorgeschükte  
rationes in der Prob nicht bestehen / noch in Erfahrung den  
Stich halten.

Vnd können zwar die Sterngucker vnd Meister des Hi-  
mels/wie sie Esa. 47. v.13. genennet werden/den alten Bund/  
der



## erschrecklichen Gewässer.

der Sommer vnd Winter/Tag vnd Nacht gemacht/wissen/  
vnd sich auff solche Ordnungen verstehen / Gen. 9. v. 22. Jer.  
31. vers. 36. Cap. 33. vers. 21. auch daher Zeiten/Tag vnd Jahr  
Gen. 1. v. 14. bis auff den letzten Scrupel eigendlich außrech-  
nen/welcher Ursachen halben sie billich in allen Ehren vnd  
Wirthen zu halten. Aber das sie vber diß zukünfftige Dinge  
von Glück oder Vnglück/auff oder abnehmen/wol oder vbel  
gehen / vieler oder weniger Menschen/ingleichem den Zustand  
Land vnd Leute/Städte vnd Dörffer / Herrn vnd Un-  
terthanen zuvor erlernen/vnd als Himmels Propheten ankün-  
digen/das wil zu viel seyn/vnd all zu hoch anlauffen. Vnd  
wird von Gott selber widersprochen/Esa. 8. v. 19. Wenn sie  
aber zu euch sagen: Ihr müisset die Warsager vnd Zeichen-  
deuter fragen/die da schwätzen vnd disputiren(so spricht) Sol  
nicht ein Volk seinen Gott fragen? In gleichem/ Esa. 41. v.  
22. Lasset sie herzu treten/vnd vns verkündigen was künfftig  
ist/Verkündiget vns / vnd weiffaget etwas zuvor/ Lasset vns  
mit vnsern Herzen darauff achten vnd mercken / wie es her-  
nach gehen sol / Oder lasset vns doch hören / was zukünfftig  
ist/Verkündiget vns was hernach kommen wird / so wollen  
wir mercken/das ihr Götter seyd. Troß / thut gutes oder  
schaden / so wollen wir davon reden/vnd mit einander schaw-  
en. Noch mehr/Esa. 43. v. 9. Lasset alle Heyden zusammen  
kommen zu hauff/vnd sich die Völcker versamlen/Welcher  
ist vnter ihnen / der solches verkündigen möge/vnd vns hören  
lassen vorhin/was geschehen sol? Last sie ihre Zeugen darstel-  
len vnd beweisen / so wird mans hören/vnd sagen/Er ist die  
Wahrheit. Letzlich Esaiæ am sieben vnd vierzigsten/v. 13. Last  
hertreten/vnd dir helffen die Meister des Himmelslauff / vnd  
Sternquæter / die nach den Monden rechnen/was vber dich

Incertæ &  
vanæ quo-  
ad futuro-  
rum even-  
tuum pres-  
dictiones.

B

fom-





## Eine Predigt von dem

2. Kommen werde. Vnd was hilfft es / das man ein Unglück zu-  
vor weiß / wenn man ihm nicht kan begegnen / noch dasselbe ab-  
wenden? Ad legem & testimonium &c. Nach dem Gesetz  
vnd Zeugniß / Esa. 8. v. 20. Nemlich Gottes Wort das ewig  
bleibet / Esa. 40. v. 8. vnd nimmer fehlen kan noch vergehen /  
Luc. 21. v. 33. ist das rechte kräftige Mittel / dadurch der heilige  
Geist Buß vnd Besserung in den Herzen der Menschen erwe-  
cken wil / Luc. 24. v. 47. Rom. 1. v. 16. Esa. 55. v. 11. vnd nicht das  
Wort der Warsager / welches zehen mal fehlet / ehe es ein mal  
eintrifft / nach dem Ausspruch Davids / Psal. 16. 11. Alle Men-  
schen seynd Lügner. Vnd welche das rescriptum Gottes / vers-  
stehe sein heiliges geoffenbartes Wort / hindan setzen / vnd wol-  
len auffer / vor oder neben demselben / dem heimlichen verborge-  
nen Gott / Esa. 45. v. 15. in seinem Rathstüblein umbstören /  
seinen Sinn vnd Vorhaben zu erfahren / vnd ihres gefallens  
zu deuten vnd auszulegen / denen wird hier in unserm Text eben  
Periphrasisscharff zugeredet / vnd gesagt:

Periphrasiss  
textus,

Wer ist der / der so fehlet in der Weißheit / vnd  
redet so mit vnderstand? Gürte deine Lenden wie ein  
Mann / Ich wil dich fragen / lehre mich.

Vnd daß wir dieses mal des anfangs der Welt / vnd ur-  
sprungs der Creature / so wol als anderer sache mehr geschwei-  
gen / welche vnter die Heimlichkeiten Gottes gehören / auch viel  
zu alt vnd fern / zu hoch vnd tieff seyn / als daß sie ein Mensch  
ertlangen vnd erreichen köndte / darvon göttliche Majestät al-  
ternächst vor vnseren abgelesenen Worten discurreirt / vnd al-  
lein bey denen dingen mit vnserer consideration bleiben / welche  
sich theils perpetuiren / theils viel vnd offft geschehen / so fraget  
sichs / Num ingressus es promptuaria nivis, & penu gran-  
dinis vidisti? Weißest du / wo Gott seine Kasten vnd Schatz-  
kammern



## erschrecklichen Gewässer.

Kammer habe/daraus er den Schnee vnd Hagel nimpt/so offte  
er denselben auff die Erden schützet/darmit die Welt zu straf-  
fen/vnd den Gottlosen eine Schlacht zu steffern? Weissetu  
woher das grawsame plitzen vnd schiessen der stralen entstehet/  
wenn der Ostwind ein Wetter zusammen treibet? woher vnd  
wohin sich die Plazregen sampt dem Gewitter zertheilen/vnd  
wer dem Donner/so es einschleget/den Weg zeiget? Es geras  
the gleich vber ein wüsten Wald/da kein Mensch wohnet/oder  
vber das Erdreich/so da durstig ist/vnd lechzet nach einem  
Regen? Wer ist des Regens Vater?(so fern Nebel vnd wol-  
cken für seine Mutter zu achten)wer zeuget die Tropffen des  
Tawes? wo ist die Mutter die das Eys gebieret/vnd wo seynd  
die Eltern/von welchen der Keyff geboren wird? Wie kömpt  
es/das das wasser/vnd offtermals die aller grösssten Zieffen  
oben zufrieren/vnd gleichsam einen Harnisch anlegen/Spr.  
am 43. Das das wasser vnter dem Eys/wie vnter einem har-  
ten Steinfelß sich verbirget/vnd hinfließt? So wenig als  
ein Mensch sich auff seine eigene Empfängniß vnd Geburt  
verstehet/so wenig kan er auch diese Dinge ergründen/so jeh  
erzehlet worden. Wunderbarlich seind Gottes werck/vnd  
das erkennet meine Seele wol/spricht David im 139. Psalm/  
vers. 14.

Vnd das wir weiter gehen/wer kan den Sommer vnd  
Herbst/Lenz vnd Winter zuwegen bringen/vnd jedem Quar-  
tal seine vnterschiedene wirtung schaffen? Wer regieret das  
Siebengestirn? wer ordnet den Jacobsstab? wer quartiret  
die zwölff Zeichen des schlimmen Circels/genennet Zodia-  
cus? Wer lencket als Schirmeister den wagen am Himmel?  
Kan auch jemand den Lauff der beweglichen vnd unbeweg-  
lichen Sternen endern/hemmen vnd auffhalten? Oder den



## Eine Predigt von dem

modum coeli, seines gefallens anordnen/vnnd gleich wie hie-  
nieden auff Erden die Empter vnnd Dienste der Himlischen  
Lichter auftheilen? Wer darff sich vnterfangen den Wolcken  
zu gebieten/das sie den Regen behalten / oder von sich geben?  
Wer kan zu wegen bringen/das auff sein Geheiß der Blitz her-  
für breche/vnnd auffwarte? Wer ist so weise vnnd verstendig/  
das er könne die Wolcken ober einander auffhormeln/vnd als  
ein volles Faß oder Braupottich anzapffen/das Wasser her-  
aus fliesse/vnnd wiederumb den Zapffen vorstecken / vnnd zu-  
spünden/das die Wassergöffe auffhören / damit nicht aller  
Staub vnd Erde zu Schlamm werde: Ja wol/sagt Gott/ein  
Mensch sey so weise vnd klug/so hoch vnnd mächtig als er im-  
mer seyn könne/so wird er doch diese vorgelegte Fragen nim-  
mermehr mit Grund vnnd Bestand aufflösen/viel wen'ger so  
weit kommen/das er diese himlische vnd vnterhimlische Werck  
moderire/oder mit seinem gebieten vnd verbieten im gering-  
sten etwas vermöge/Sondern diese vnnd andere Posten mehr  
gehören ad regalia & reservata DEI, von welchen wir Mosiss  
Wort brauchen können/Deut. 32. v. 34. Ist solches nicht bey  
mir verborgen/vnd versiegelt in meinem Schätzen? Uns ge-  
büret nicht zu wissen Zeit vnd Stunde/welche der Vater seiner  
macht vorbehalten/Act. 1. v. 17.

V 5 V 5.  
Pl. 104.  
v. 3.

Lernen demnach hieraus/das Gott allein des Himmels  
Meister vnd Herr sey/vnd solches nicht allein aus vnd nach  
der Schöpfung/sondern auch wegen der Erhaltung vnd Res-  
gierung. Denn gleich wie er den Himmel anfangs gewelbet/  
vnnd an dessen Feste die Sonne vnnd Gestirn gesezet/das sie  
Licht vnd Finsterniß scheiden sollen/Genes. 1. Also muß ihm  
auch alles zu gebot stehen/vnd auffwarten/wenn vnnd worzu/  
auch wohin/vnd wieder wen er eins oder das andere brauchen  
vnd



## erschrecklichen Gewässer.

vnd haben wil/es sey Sonn oder Mond/Psal. 121. v. 6. Wol-  
cken oder Schnee/Regen oder Hagel/Schlossen oder Reiff/  
Pliken oder Donner/Fewer oder Dampff/Sturmwind oder  
Wasser/wie solches beydes die Sprüche so wol als die Exempel  
der Schrifft außweisen/Esaiæ 40. v. 26. Hebt ewre Augen  
auff in die höhe/vnnd sehet/wer hat solche Ding geschaffen?  
vnnd führet ihr Heer bey der Zahl heraus/der sie alle mit Na-  
men ruffet. Psalm 135. v. 6. Der H E R R thut alles was er  
wil/im Himmel/auff Erden/im Meer/vnnd in allen Tief-  
fen/der die Wolcken lest auffgehen/vom Ende der Erden/der  
die Pliken sampt dem Regen macht/der den Wind aus heim-  
lichen örtern kommen lest/Psal. 147. v. 4. Er zehlet die Sier-  
nen/vnd nennet sie alle mit Nahmen. Psalm 74. v. 16. Tag  
vnnd Nacht ist dein/du machest das beyde Sonn vnd Gestirn  
ihren gewissen Lauff haben/Psal. 104. v. 19. Genesis 8. vers.  
22. Psalm. 147. v. 16. Er gibt Schnee wie Wolle/Er stre-  
wet Reyffen wie Aschen/Er wirfft seine Schlossen wie Bis-  
sen/Wer kan bleiben für seinem Frost? Er spricht/so zerschmel-  
get es/Er lest seinen Wind wehen/so thawets auff. Psalm.  
148. v. 8. Fewer/Hagel/Schnee/Dampff/Sturmwinde rich-  
ten sein Wort aus/Syr. 43. Er machet durch seine Krafft die  
Wolcken dick/das Hagel heraus fallen/sein Donner erschre-  
cket die Erde/vnd Berge zittern vor ihm. Eben dieses bezu-  
gen auch die Exempel/so in grosser anzahl vorhanden: Als  
Pharao die Kinder Israel nicht wolte ziehen lassen/vnnd sein  
Herk je mehr vnd mehr verstockte/ließ der H E R R donnern  
vnd hageln/das das Fewer auff die Erden schoß/Exod. 9. vers.  
23. Vnd welches das Buch der Weißheit mit fleiß notiret/  
war das das aller wunderlichste/das Fewer am meisten im  
Wasser brandte/welches doch alles aufleschet/Cap. 16. vers. 17





## Eine Predigt von dem

Als Josua die fünf Könige der Amoriter in die flucht schlug/  
ließ der H E R R einen grossen Hagel vom Himmel auff sie  
fallen/das ihr viel mehr starben vom Hagel/ denn die Kinder  
Israel mit dem Schwerd erwürgeten / Josua 10. v. 11. Sa-  
muel brachte durch sein Gebet zu wegen/das es zweymal don-  
nern vnd wittern mußte/einmal mit Schaden der Philister /  
Das andermal zum Schrecken des Volcks Israel/2. Samuel  
7. v. 10. vnd 12. v. 18. Vnd was mag wol das rauschen auff  
den Wipffeln der Maulbeerbäumen anders gewesen seyn /  
denn vnsers lieben G Dtes Donnerstimme vnd brausen/da-  
durch er die Philister für David erschreckt vnd geschlagen /  
2. Samuel 5. v. 24. Des ist nicht new/das Gott regnen leß  
vber die Gottlosen/Pliz/Fewer vnd Schwefel/vnd gibt ih-  
nen ein Wetter zu Lohn/ Psalm/ 11. v. 6. Wie an den Sodomis-  
tern vnd andern Feinden Gottes ergangen/Darvon der 18.  
Psalm/ v. 8. saget/ Die Erde bebete/vnd ward beweget / vnd  
die Grundfeste der Berge regeten sich/vnd bebeten da er zornig  
ward. Dampff gieng auff von seiner Nasen/vnd verzehrend  
Fewer von seinem Munde/das es davon blizet. Er neigete  
den Himmel/vnd fuhr herab/vnd tuncel war vnter seinen  
Füssen. Vnd fuhr auff dem Cherub/vnd flog daher / er  
schwebete auff den Fittigen des Windes. Sein Gezelt omb  
ihn her war finster/vnd schwarze dicke Wolcken / darinnen  
er verborgen war. Vom Glantz für ihm trenneten sich die  
Wolcken/mit Hagel vnd Blizen. Vnd der H E R R don-  
nerte im Himmel/vnd der Höhest ließ seinen Donner aus mit  
Hagel vnd Blizen. Er schoß seine Straal/vnd zerstreute  
sie/Er ließ sehr blizen / vnd schreckt sie. Da sahe man Was-  
fergüsse/vnd des Erdboden grund ward auffgedeckt/ H E R R  
von deinem scheßten/von dem Athem vnd schnauben deiner  
Nasen,

Gen. 18.



## erschrecklichen Gewässer.

Nasen. Als Jonas der Prophet für dem HErrn flohe/ vnd sich auff's Wasser begab/ ließ der HErr einen grossen Wind auff's Meer kommen/ vnd erhob sich ein groß Ungewitter auff dem Meer/ vnd bekennet Jonas selber/ das solch groß Ungewitter vmb seinet willen vber die andern kommen sey/ E. I. v. 4. vnd 12.

Wann denn der HErr/ wie aus angezogenen Sprüchen vnd Exempeln oberflüssig erscheinet / alle Ding im Himmel vnd auff Erden ordnet/ dirigiret vnd schafft/ vnd ihme hierinnen kein Mensch einreden noch einrathen / viel weniger die Hand mit anlegen vnd helfen kan noch darff: Als muß falsch vnd vnrecht seyn/ wenn man saget/ Es geschehe diß vnd jenes ohne gefehr/ gleich wie sich Sapient. 2. v. 2. Die nasse Kotte hören leß/ Dhn gefehr seynd wir geboren/ vnd fahren wieder dahin/ als weren wir nie gewest. Oder es fliesse alles her aus einem vnermeidlichen Nothzwang / vnd könne anders nicht gehen/ denn wie es gehet / Sondern es stehet alles in Gottes Hand/ vnd ohne dessen Willen vnd Versehen/ kan nichts geschehen. Vom ihm/ durch ihn/ vnd in ihm seynd alle Ding Rom. II. v. 35. Wie köndte etwas bleiben/ wenn du nicht woltest/ Oder wie köndte erhalten werden / das du nicht geruffen hettest/ Sap. 11. v. 25. Ich bin der HErr/ vnd keiner mehr/ der ich das Liecht mache/ vnd schaffe die Finsterniß/ der ich Friede gebe/ vnd schaffe das Vbel/ Esa. 45. v. 7. Er machet alle seine Werck/ wie es ihm gefellet/ Syr. 33. v. 13. Er ruffet der dürre das der Himmel seinen Thaw vnd Regen vber vns verhalten muß/ Hag. 1. v. 10. vnd 11. vnd feuchtet auch hinn iederumb die Berge von oben her/ Psal. 104. v. 13.

Er weist hiemit/ erstlich/ seine Weißheit/ so da reichet von einem Ende zum andern gewaltiglich/ vnd regieret alles wol/ Sap. 8. v. 1. Sapientia eius non est numerus, Es ist vnbe- greifflich wie er regieret/ Psal. 140. v. 7. Er hat alle seine Werck weiß

Ad agnos-  
cendam  
Sapientiam  
Dei.



## Eine Predigt von dem

weißlich geordnet/Psal. 104. v. 24. Er beweiset seine Weißheit herrlich/ vnd siehet zu welcher zeit ein jegliches geschehen werde/Syr. 43. v. 19.

Omnipot  
tentiam.

Darnach lest er auch hiermit sehen seine Majestät vnd Allmacht/wie hiervon David redet/Psal. 29. v. 4. Vox Domini in virtute, Die stimme des HERRN gehet mit macht / die Stimme des HERRN gehet herrlich/der Gott der Ehren donnert/vers. 3. Vnd Elihu saget/Cap. 36. v. 27. Er machet das Wasser zu kleinen Tropffen/vnnd treibet seine Wolcken zusammen zum Regen/das die Wolcken fließen/vnnd trieffen sehr auff den Menschen / Wenn er fürnimmet die Wolcken außzubreiten/wie sein hoch Gezelt / Sihe / so breitet er aus seinen Blick vber dieselbige/vnnd bedeckt alle Ende des Meeres/Denn damit schreckt er die Leute / vnnd gibt doch Speise die Fülle/Er deckt den Blick wie mit Händen / vnnd heist es doch wiederkommen/Davon zeuget sein Geselle/nemlich/ des Donners Zorn in Wolcken. Darumb zittern die Seulen des Himmels/vnd entsetzen sich für seinem schelten/Job. 26. v. 11. Wer wil den Donner seiner Macht verstehen/vers 14. Vnnd Jeremias 10. v. 13. vnnd Cap. 51. v. 16. Wenn er donnert/so ist des Wassers die Menge vnter dem Himmel/vnd zeucht die Nebel auff vom Ende der Erden / Er machet die Blitzen im Regen/vnnd lest den Wind kommen aus heimlichen Orten. Dir H E R R ist niemand gleich / du bist groß / vnd dein Name ist groß/vnnd kanst es mit der That beweisen/Wer solte dich nicht fürchten/du König der Heyden? Dir solte man ja gehorchen.

Bonitatem:

Er beweiset auch vber diß mit dem Regenwetter seine Güte vnd Trew gegen die / so seinen Bund vnd Zeugniß halten/vnnd geben acht auff seiner Hände Werck/Deut. 27. v. 12. Welches



## erschrecklichen Gewässer.

Welches Jeremias Gott den H E R R R erinnert/ Cap. 4  
v. 22. Es ist doch ja vnter den Heyden Götzen keiner der Regen  
kündte geben/so kan der Himmel auch nicht regnen / du bist  
doch ja der H E R R vnser Gott/auff den wir hoffen./denn du  
kannst solches alles thun. Vnd Paulus prediget eben dieses/  
denen zu Lystra/ Actor. 14. v. 17. Gott der gemacht hat Him-  
mel vnd Erden vnd das Meer/vnd alles was darinnen ist / hat  
sich nicht vnbezeuget gelassen/sondern vns viel gutes gethan/  
vnd vom Himmel Regen vnd fruchtbare Zeitung geben/vnnd  
vnserer Herzen erfüllet mit Speise vnd Freuden. Job. 37. v.  
12. Er lehret die Wolcken wohin er wil / das sie schaffen alles  
was er ihnen gebeut auff dem Erdboden / es sey vber ein Ge-  
schlecht/oder vber ein Land / so man ihn barmherzig findet.  
Vnd hieher gehöret / was im 65. so wol als im 104. Psalm  
weitleufftiger erzehlet wird. Wenn man aber Gott nicht er-  
kennen wil/nach fürchten/der vns Frühregen vnd Spätregen  
gibt zu rechter zeit/vnnd vns die Erndte treulich vnd Jährlich  
behütet/Jerem. 5. v. 24. So nimpt er seinen Segen wieder zu  
sich/lest den Himmel/der vber vnserm Haupt ist/Ehren/vnnd  
die Erde vnter vns Eysen werden/ Deut. 28. v. 23. Gibte entwe-  
der Staub vnnd Aschen für Regen/ oder rüstet seine Creatu-  
ren zum Streit vnd Verderben wider die Gottlosen /wie sol-  
ches nachfolgende Sprüche bezeugen vnnd aussagen: Job am  
37. v. 6. Er spricht zum Plazregen/so ist er da mit Macht / Al-  
le Menschen hat er in der Hand/alles beschlossen/das die Leu-  
te lernen was er thun kan. Syrach am 40. v. 35. Feuer/ Ha-  
gel/Hunger / Todt / solches alles ist zur Rache geschaffen/die  
wilden Thier/ Scorpion/Schlangen vnnd Schwerdt seynd  
auch zur Rache geschaffen/zu verderben die Gottlosen/ Wie  
Freuden thun sie seinen Befehl / vnnd seynd bereit / wo er ih-  
E bedarff

Iustitiam &  
Iudicium

Cum ergo  
improbi.





## Eine Predigt von dem

Bedarff auff Erden/ vnd wenn das Stündlein kömpt/ lassen sie nicht abe/ Psal. 1. 48. v. 8. Feuer/ Hagel/ Schnee/ Dampff vnd Sturmwind richten sein Wort aus/ Sap. 5. v. 21. Er wird den strengen Zorn wezen zum Schwerdt/ vnd die Welt wird mit ihm zum Streit außziehen wieder die Bnweisen/ die Geschos der Bliken werden gleich zutreffen/ vnd werden aus den Wolcken/ als von einem hartgespanneten Bogen fahren zum Ziel/ vnd wird dicker Hagel fallen/ aus dem Zorn der Donnerschläge. So wird auch des Meeres wasser wider sie wüten/ vnd die Ströme werden sich miteinander hefftig ergiessen/ vnd wird auch ein starcker Wind sich wider sie legen/ vnd wird sie wie Würtel zerstrawen. Vnd im 16. Cap. v. 24. Die Creatur/ so dir als dem Schöpffer/ dienet/ ist hefftig zur Plage ober die vngerechte/ vnd thut gemach zur wolthat ober die/ so dir trawē. In vnserm Text stehet/ das Gott den Hagel verhalte/ bis auff die zeit der Trübsal/ vnd auff den tag des Streits vnd Kriegs. Denn wenn man nicht bedencket/ was zu vnserm friede dienet/ vnd lest die zeit der gnedigen Heimsuchung fürüber rauschen/ Luc. 19. v. 42. So begiebt sich der H. E. R. R. der Herrschaer in Harnisch/ vnd gebeut allen Creaturen auff/ das sie wider seine Feinde/ vnd vngheorsame Rebellen/ o. er abtrünnige Kinder zu Felde ziehen/ vnd der massen hauphalten/ das weder kopff noch Schwanz vberbleibet/ vnd beydes Aß vnd Strumpff abgehawen wird auff einen Tag/ Esa. 9. v. 14. Denn wie wir zu anderer zeit hören/ so hat er zweyerley Buspredigten/ damit er der Welt zuspricht/ Die eine bestehet im Wort/ die andere im Werck/ jene gehet vor/ diese folget nach/ Inmassen ander ersten Welt/ an Sodoma vnd Gomorra/ an Jerusalem/ an Pharao/ an den Babyloniern/ Ninivitem vnd andern Bösckern/ zu sehen/ denen Gott Bedenckzeit gnugjam gegeben/ ehe er  
mit



## erschrecklichen Gewässer.

mit ihnen den Baraus gemacht/welches das Buch der Weisheit rühmet/Cap. 12. v. 10. Durrichtest sie mit der Weile / vnd lieffest ihnen raum zur Busse / 2. Cron. 36. v. 15.

Gleich wie ein Vater seine Kinder erstlich mit Worten straffet / vnd darnach die Ruthe brauchet / wann die Wort nichts helffen noch gelten wollen / Also thut auch der jenige / welcher der rechte Vater ist vber alles was da Kinder heist / im Himmel vnd auff Erden / Ephes. 3. v. 15. Nemblich / er ist ein rechter Richter / vnd ein G. D. der täglich dräwet / wil man sich nicht bekehren / so hat er sein Schwerdt gewesse / vnd seinen Bogen gespannet / vnd zieleet / vnd hat darauff gelegt tödtliche Geschos / seine Pfeile hat er zugrich zu verderben / Psal. 7. v. 12. Je lenger er inne helt mit der Straffe / je schwerer er nachdrucket / Vnd prediget nicht mehr mit Worten vnd durch Menschliche Stimme / sondern mit Donner / Sewer / Hagel / Ungewitter / Sturmwinde vnd Sündfluten / auff das die Welt sehen solle das Brtheil / das er hat gehen lassen / vnd seine Hand / die er angeleget hat / vnd jederman erfahre / das er der H. E. X. X. sey / Ezech. 39. v. 21. der heilige vnd gerechte in Israel / der alle ding recht regieret / vnd achtets seiner Majestät nicht gemäß jemand zu verdammen / der die straffe nicht verdienet hat / Sap. 12. v. 15. Doch müssen in gemeinen Landstraffen auch die Frommen mit herhalten / vnd offtermals am meisten einbüßen / wie denn Gott gemeiniglich den anfang zu plagen macht an der Stadt / die nach seinem Namen genennet / Jer. 25. v. 29. Vnd wie Petrus saget in seiner ersten Epistel / am 4. v. 17. So ist es zeit / das anfahe das Gerichte am Hause G. Dites / vnd wenn Gott beföhlet / seinen Männern / durch die Stadt zu gehen / vnd drein zuschmeissen / so müssen sie an seinem Heiligthumb anfahren / Ezech. 9. v. 6. Denn er findet auch





## Eine Predigt von dem

an seinen Boten Thorheit / vnd vnter seinen Knechten ist kei-  
ner ohne tadel / Hiob 4. v. 18. Darumb züchtiget vnd richtet  
er sie / daß sie sich nicht vnschuldig halten / Esa. 27. v. 10. Ze-  
rem. 30. v. 11. vnd 47. v. 28. Vnd so wir vns selber richten / so  
würden wir nicht gerichtet: Wenn wir aber gerichtet wer-  
den / so werden wir vom H E R R R gezüchtiget / auff daß wir  
nicht sampt der Welt verdammet werden / 1. Corinth. 11. v. 32.  
Darvon redet auch die Weisheit Gottes mit gedencckwürdigen  
Worten / Cap. 12. v. 18. Du gewaltiger Herrscher richtest mit  
Lindigkeit / vnd regierest vns mit viel verschonen / vnd giebst  
darmit zu verstehen / daß wir sollen guter Hoffnung seyn / daß  
du wollest Busse für die Sünde annemen / vnd züchtigest vns  
das wir deiner Güte mit fleiß warnehmen / vnd ob wir gerich-  
tet würden / daß wir doch auff deine Barmherzigkeit trawen  
sollen.

applicatio  
ad presens  
tit.

Welches alles wir nicht allein in gemein vns müssen ge-  
sagt seyn lassen / Sondern auch insonderheit auff Was vnd  
jetzigen vnsern Zustand accommodiren. Denn vns allen mit  
einander vnergessen / was am Sonnabend in der Nacht ge-  
schehen / was etliche Stunden lang für ein stetig donnern / vnd  
vnauffhörlich blitzen gewesen / von sieben bis nach zwölff Uh-  
ren / da sich ansehen ließ / als wenn die Welt vntergehen / vnd  
die Berge mitten ins Meer sincken wolten / Psalm 46. v. 3.  
So grausam wüetet vnd waltet das wilde Wasser / oder wie  
voriger Psalm redet / das Meer / das auch die Berge von sei-  
nem Vngestümb hetten einfallen mögen: Vnd giengen die  
Element durch einander / vnd was auff dem Land zu seyn pfleg-  
te / das war im Wasser / vnd was im Wasser zu seyn pflegte /  
gieng auff dem Lande / Sap. 19. v. 17. Vnd dieses nicht allein  
allhier bey vns / vnd in den angränkenden Thälern / sondern  
auch in andern / von vns entlegenen örtern / den in einer Nacht //  
vnd



## erschrecklichen Gewässer.

vnd wie der Laut gehet/ fast zu gleicher stunde ist einerley don-  
nern/wittern vnd regen gewesen/in Städten vnd Dörffern/  
vber die acht Meilweges in der breite/vñ vber 10. nach der leng-  
ge: Ja es wird geschrieben/das nicht allein diß schreckliche Ge-  
witter vber ganz Thüringen von der Sala an bis an den Harz  
gestanden/sondern zu gleich auch etliche fürnehme örter inn  
Sachsen berühret/vnd wird die zeit je länger je mehr bringen.

Was für grawsam/vnd zuvor vnerhöret Gewässer ist er-  
folget: An manchem ort ist die Ilme in zehen/zwölff elen hoch  
vber ihren Strom gestiegen. Was für schaden/vnd leider bey  
vielen vnwiderbringlichen schaden hat dieses gewässer gethan/  
an Menschen vnd Viehe/an Schafen/Kühen/Schfen/Pfer-  
den/an Aekern/Gärten vnd Wiesen/an Wohnhäusern/ Kel-  
lern/Mühlen/Ställen/Schewren/vnd andern Gebäwen/  
an Mawren vnd Wänden/an fruchtbaren vnd andern Bäu-  
men/an dem Gras vnd Früchten auff dem Felde/an Geträn-  
cke vnd Bier in den Kellern. Das Land war vor dieser Was-  
serflut wie ein Lustgarte/aber nach derselben ist es wie eine wü-  
ste Einöde/Joel 2.v.3. An allen Orten werden täglich meh-  
ertrunckene Menschen gefunden.

**Z**u Weimar /eynd allein 65. Menschen/25. Pfera-  
de/175. stück Viehe ertruncken / 44. Wohnhäuser  
vnd Schewren hinweg gerissen worden/zu Mel-  
lingen sind/verdorben 22. Menschen/36. Häuser/Zu  
Kromsdorff stehen noch die wenigsten Häuser / die  
meisten hat das Wasser:/wie auch zu Eberstett vnd  
andern Orten mitgenommen / Zu Kosla seynd et-  
liche hundert Schafe/zu Mattstett 25. Personen / zu  
Eberstett 23. Personen/zu Niderdrebra 19. zu Sulza



Eine Predigt von dem

auch etlich vnd zwanzig Menschen im Wasser blieben. In gleichem zu Centra zehen: Zu Naue zwanzig: Zu Ammerbach eine: Zu Krauthem hinter dem Eittersberge sechzehen Personen/ vnd vierzig Bohnheuser: Zu grossen Brembach neun vnd dreissig Menschen/ vnd neunzig Heuser (vnd etwas drüber) zu kleinen Brembach fünf vnd zwanzig Personen untergangen. Ohne was geschehen an andern Orten/ als zu Reinstadt/ Gumperda / vnd in selbigen Kalischen Grunde/ zu Altenberga vnd Altvorff/ zu Göttern/ Sinderstedt/ Magdala/ zu Cappellendorff/ Sultzbach/ Herressen/ Aspolda. Zu Gotha / vnd sonst hin vnd wieder / hat es grausame Schlossen geworffen/ vnd in vielen Fluhen das Wintergetreidig weggeschlagen: Mühlhausen/ Langen Salza vnd Zimmern/ haben auch ihr theil nicht mit geringem Schaden empfunden. Was die Unsrut vnd die Loffa gethan/ welche beyde Wasser sich gewaltig ergossen/ das wird man künfftig erfahren: Vnd dieses ist alles in einer Nacht geschehen. Aber:

g. Acac'id.

Quis cladem illius noctis? quis funera fando  
Explicet? aut possit lachrymis æquare labores?

Was für ein Jammer muß es gewesen seyn/wenn die Eltern ihre Kinder / der Mann sein Weib/ der Bruder seine Schwester/ vnd ein Freund den andern/ hat sehen im Wasser zappeln/ vnd hören schreyen vnd ruffen/ vnd hat ihnen doch nicht



## erschrecklichen Gewässer.

nicht heiffen noch beybringen können/sondern neben vnd mit ihnen verderben müssen? Was für ein Spiegel vnd Jammerspect. solt ist es/wenn man hier vnd dort sieht die Häuser verwüestet/die Gärten verödet/das Feld verschlammet/die Saat verschweimmet/vnd die Todten am Bfer liegen/oder auch wol an den Bäumen hangen? Ach der H E R R hat gethan was er fürhatte/er hat sein Wort erfüllet/das er lengst zuvor gebotten hatte/er hat ohne Barmherzigkeit zerstöret/ Ehren. 2. v. 17. Er hat vns voll Jammers gemacht am Tazge seines grimmigen Zorns. Ehrenor. 1. v. 12. Wie lang/wie viel/wie oft haben die Boten des Friedes gewinselt/vnd jede man zur Busse geruffen? was für vielfaltige Postboten hat Gott foran geschicket? Wie lange ist es/das erstlich zu Eunniz auff einmal vier Menschen/vnd hernacher auch bey vns zu Jeyna/eben so viel ertruncken/da sich die Saal etwas ergossen? Was ließ sich nach Martini/abgewichenen Jahres/für ein grewlicher Wind hören der Häuser vnd Wälde entblößet? Hat vns Gott nicht zwey Jahr auff einander müßige Zähne gegeben/vnd mangel an Brodt/an vielen Orten? Hat er nicht Pestilenz vnter vns geschicket/vnd viel junge Mannschafft durchs Schwerdt/bey so langwirigem Türckenkrieg getödtet? Hat er nicht Städte vnd Dörffer vmbgekehret/wie Sodoma vnd Gomorraha/das sie worden sind wie ein Brand? Aber wer hat sich daran gekehret vnd bekehret? Wer hat sich gebessert? Wer ist frömmere worden? Noch bekehret ihr euch nicht zu mir/spricht der H E R R/Amos 4. Wolan so tretet nun her/das ich mit euch rechte für dem H E R R R/vber alle Vbelthat/die er an euch vnd ewren Vätern gethan/1. Sam. 12. vers. 7. Vnd vber alle Vbelthat/damit ihr Gott erzürnet. Gott hat sein Feuer vnd Herd bisher vnter vns gehabt/vnd diese Stadt/gleich wie Capernaum/biß an den Himmel.



## Eine Predigt von dem

Himmel erhoben / Matth. 11. vers. 23. Er hat fest gemacht die Kiegel unserer Thor / vnd unsere Kinder darinne gesegnet / Er hat unsern Gransen Friede geschaffet / vnd vns gesättiget mit dem besten Weizen / Psalm / 147. v. 13. Die wohnungen in der Wüsten sind fett gewesen / das sie getroffen / die Hügel lustig / die Anger voll Schaffe / die Awen dick mit Korn / Psal. 65. v. 13. Vnd nach dem viel Vöcker sitzen im Finsterniß vnd Schatten des Todtes / Luc. 1. Hat er vns gezeiget sein Wort / vnd vns lassen wissen seine Sitten vnd Recht / Psal. 147. v. 27 vnd vns gesegnet mit allerley geistlichen Segen in himlischen Gütern / durch Christum / nach dem Reichthumb seiner Gnade welche vns reichlich wiederfahren ist / durch allerley weißheit vnd Klugheit / vnd hat vns wissen lassen das Geheimniß seines willens / nach seinem wolgefallen / Ephes. 1. v. 8. Aber wie haben wir vns hiergegen verhalten? Lasset vns forschen vnd suchen unser wesen / Ehrenor. 3. v. 40. Gebt Gott die Ehre / vnd gebt ihm das Lob / vnd saget an / was ihr gethan habt / Jos. 7. v. 19. Was kan für eine Sünde wieder die erste vnd andere Tafel genennet werden / die man nicht sollte vnter vns gehöret haben: Was für fluchen / schweren / zaubern / Gotts lästern / verachten göttliches Worts vnd Ordnung / ungehorsam wieder geistliche vnd weltliche Eltern ist im schwang gangen: Wie viel Ehebruch / Hurerey / Morde vnd Todtschlag seynd begangen / die nicht allein ungestraft blieben / sondern die auch noch von den gelsüchtigen Advocaten beschönet / vertheidiget / entschuldiget / vnd so hoch getrieben worden / das das Recht in Vermut verkehret / vnd die Gerechtigkeit zu boden gestossen / Amos 5. v. 7 Das aus Liecht Finsterniß / vnd aus Finsterniß Liecht / aus sawer süß / vnd aus süsse sawer gemacht / vnd das Recht in Vnrecht verwandelt wird / Esais 5. v. 20. Denn der H E R R hat Besach zu schelten / die im Lande



## erschrecklichen Gewässer.

Lande wohnen. Denn es ist keine Treu/keine Lieb/kein Wort Gottes im Lande/Sondern gottslästern/liegen/morden/stellen vnd ehebrechen hat vberhand genommen/vnnd kömpt eine Blutschuld nach der andern. Darumb muß das Land jämmerlich stehen/vnd allen Einwohnern vbel gehen/denn es werden auch die Thier auff dem Felde/vnnd die Vögel vnter dem Himmel/vnd die Fische im Meer weggerafft werden/ Hof. 4. v. 1. Aber wer gleubets/das Gott so sehr zürnet/vnd wer fürchtet sich für seinem Grim/Psal. 90. Wer gleube vnser Predigt/vnnd wem ist der Arm des HErrn offenbahret / Esa. 53. Warlich das Volck ist müde sich zum HErrn zu kehren / vnd wie man ihnen prediget/so richtet sich keiner auff/Hof. II. v. 6. Man ist nicht allein dem gram/der im Thor straffet/vnd helet den für ein Grewel der heilsam lehret/Amos 5. v. 10. Sondern des HErrn Wort ist vns zum Hohn vnd Spott worden täglich/ Jerem. 20. v. 9. vnnd Ezechiel hat müssen noch heut bey Tage (oder vielleicht bey Nacht) ein Liedlein seyn / das man gerne gesungen vnd gespiellet/Ezech. 33. v. 32. vnnd gesagt/Gebeut hin/gebeut her/harre hie/harre da / hie ein wenig / da ein wenig/Esa. 28. v. 10. Ohne was von heimlichen stummen Sünden geschehen/so schändlich zu sagen/vnd von Blutstürzung so grosses theils vngestraftet/vnd derentwegen das Land niemals versöhnet worden/Num. 35. v. 33. Stehet vns doch der Spiegel göttliches Zorns für Augen/vnd der Stanck von den ertrunckenen gehet vns in die Nasen/gleichwol lehret sich niemand dran/da ist keiner der in sich schläge/dem seine Bosheit-leid were / vnnd spreche / Was mach ich doch/ Jerem. 8. v. 6. Ja das noch mehr vnnd erger ist / eben in der Nacht / da sich Gott hören lassen im Wetter/haben sich Belials Kinder hören lassen mit tollisiren/schreyen vnd jauchzen/anders nicht als wenn sie Gott trozen/vnnd den Himmel stürmen wolten.

D

Vnd





## Eine Predigt von dem

Und ist des wüsten wilden wessens noch kein Ende noch auff-  
hören/man jauchzet mit Pancken vnd Harffen/vnd ist frölich  
mit Pfeiffen/Job 21. v. 12. Die verschonet vnd vnbeschädiget  
blieben/bekümmern sich wenig vmb den Schaden Joseph/ ha-  
ben mit andern kein mitleiden/rauben vnd stelen zur Rechten  
vnd Linken wo sie nur etwas bekommen können/ vnd achten  
sich fern vom Vnglück/gleich als hetten sie mit dem Tode ein  
Bund/vnt mit der Hellen ein Verstand gemacht/das/wen ei-  
ne Flut daher gehe/solche sie nicht treffen könne/ Esa. 28. v. 15.  
Was wil nun letztlich daraus werden? Solte Gott sie vmb sol-  
ches nicht heimsuchen/vnnd solte seine Seele sich nicht rechnen  
an solchem Volck/wie diß ist? Jer. 5. v. 7. Des ist zu besorgen/  
diese vnerhörte Wasserfluten seyn nicht allein Straffen der  
begangenen Sünden/sondern portendirn noch ein grössers/so  
dahinden/Entweder den allgemeinen letzten Vntergang der  
Welt/dessen Anzeig auch das brausen des Meers vñ der Was-  
serwellen Christus sehet/Luc. 22. v. 25. Oder ein andere Straf-  
se so vber die Einwohner dieses Landes kommen sol. Denn das  
Sündenmaß ist voll / & completæ sunt iniquitates Amor-  
rhæorum, Gott kan lenger nicht schonen/sondern muß drein  
sehen/vnd das böse weg thun von seinen Augen: Der Sün-  
den dieses Volcks seynd zuviel/vnd bleiben verstocket in ihrem  
Vngehorsam / wie sol ich dir denn gnädig seyn? Spricht der  
HERR/ Jerem. 5. v. 7. Animi indocti erraverunt, Die thö-  
richten Leute fehlen/welche die Gerichte Gottes nicht achten/  
Sapient. 7. v. 1. werden dahin gegeben in einen verkehrten  
Sinn/Rom. 1. v. 28. vnnd gehet ihnen wie den Söhnen Eli /  
von denen geschrieben sthet / 1. Samuel 2. v. 25. Sie ge-  
horchen des Vaters Stimme nicht/denn der HERR hatte wil-  
lens zu tödten. Ich mercke wol/spricht dort der Prophet zu dem  
Könige Amazia/2. Chron. 25. v. 16. Das Gott sich berathen  
hat/



## erschrecklichen Gewässer.

hat/dich zu verderben/weil du solches gethan hast/vnnd gehorchest meinem Rath nicht.

Iratus ad pœnam si quos Deus trahit,  
Auferre mentem talibus primum solet  
Caliginemq; offundit, ut ruant suas  
Furentur in clades, sibi quas noxijs  
Accersierunt ultrò consilijs malis.

So viel vns zu Jehna betrifft/hat zwar die Leuter/welche dieser Stadt von alters her ein groß Unglück dräwet/sich dermassen ergossen/dergleichen kein Mann gedencket/also/das sie grosse mächtige Sawhölzer auffgehoben/mitgeführt/zerbrochen/vnd schwere Lastwägen fortgetrieben vnd zerissen/auch an Häusern/Wasserröhren vnd Wänden ziemliche Risse gethan/Aber doch ist kein Mensch im Wasser vmbkommen/vnnd auffer dreyen stücken/auch kein Viehe/Da doch dieser tieffgelegener Ort/viel mehr denn andere/sich Wassers halben zu befahren. Was ist die Ursach? Vnd wenn wollen wirs zumessen? Misericordie Domini, quod non consumpti sumus, Die Güte des HErrn ist/das wir nicht gar aus seynd/Ehren. 3. v. 22. Warlich/warlich/wenn vns der H E R R Zebaoth nicht hette lassen ein wenigers (vom heiligen Samen) vberbleiben/so weren wir wie Sodoma/vnd gleich wie Gomorraha/Esa. 1. v. 9. Rom. 9. v. 29. Icho hat G D I t vnser verschonet/vnnd an vns ein Beyspiel seiner gnädigen Hülffe sehen lassen/Wie er denn auch an vielen andern Orten die Leute wunderbarer vnd vbernatürlicher weise auff den Bäumen/Dächern/vnnd sonst erhalten/oder aus dem Wasser/darauff sie sehr weit wie die Enten geschwommen/wiederumb errettet/vnnd sie aus ihren ängsten geführt/zu welchen der 107. Psalm/v. 31. saget / Die sollen dem HErrn

D i j

Dans



## Eine Predigt von dem

dancken vmb seine güte vnd seine Wunder/die er an den Menschenkindern thut: Aber sein Zorn lest nicht abe/vnnd seine Hand ist noch nicht außgereckt/Esa.9.v.17. Quod differtur, non aufertur, Geborget ist nicht geschencket: Er kan vns noch allzeit finden/je lenger je schrecklicher: Ich werde ihre Sünde wol heimsuchen/wenn meine Zeit kömpt heinzusuchen/Exod. 32.v.34.

Conclusio.]

Weil denn diesem also/vnnd vns Gott mit dem Barauß dräwet/so schicke dich Israel/vnnd begegne deinem Gott/Amos 4.v.13. Denn sihe/er ist/der die Berge machet/den Wind schaffet/vnd zeigt dem Menschen was er reden sol/Er machet die Morgenröthe/vnd die Finsterniß/er tritt auff die Höhen der Erden/er heist H E R R Gott Zebaoth. Bessere dich Jerusalem/ehe sich das Herz Gottes von dir wende/vnd er dich zum wüsten Land mache/darinnen niemands wohne/Jer.6.v.8. Gott hat dich lange zeit gewarnet durchs Wort/Er hat dich auch nunmehr gewarnet mit dem schrecklichen Zornspiegel/so vor Augen schwebet. Es ist manch frommes Mutterkind in dem Wasser ombkommen/das nicht gewußt vnterscheid/was recht oder linck ist/Jon.4.v.11. vnnd das nur die helffte vnserer Sünden gethan/Ezech.16.v.51. So aber zu Erst an solchen/was wils für ein Ende werden mit denen/die dem Evangelio nicht glauben? Vnd so der Gerechte kaum erhalten wird/wo wil der Gottlose vnd Sünder erscheinen? 1.Pet.4.v.18. Sihe/die jenigen/so es nicht verschuldet hatten/den Kelch zu trincken/haben ihn müssen trincken/vnd du soltest vngestraft bleiben? Du solt nicht vngestraft bleiben/sondern du must auch trincken/Jer.49.v.12. Oder meynet ihr/das die allein seynd Sünder vnd schuldig gewesen/für andern Menschen/weil sie das erlitten haben? Ich sage nein/sondern so ihr euch nicht bessert/werdet ihr alle auch also ombkommen/sprichs



## erschrecklichen Gewässer.

Spricht Christus/Luc. 13. v. 5. Darumb ihr meine Geliebte/  
vber welchen ist der gute Geist des HErrn/demütiget euch für  
dem Herrscher aller Welt / der da donnert ist im Himmel / von  
dessen schelten die Wasser stehen/Psal. 104. v. 7. Suchet den  
HErrn weil er zu finden ist/ruffet ihn an / weil er nahe ist / der  
Gottlose lasse von seinem Wege / vnd der Vbelthäter seine  
Gedancken / vnd bekehre sich zum HErrn / Esa. 55. v. 6. Er ist  
gnädig / barmhertzig / gedültig vnd von grosser güte / vnd rewet  
ihn bald der Straffe. Wer weiß / es mag ihn wiederumb ge-  
rewen / vnd einen Segen hinter sich lassen / Joel 2. v. 13. vnd  
14. Fürchtet den HErrn / ihr seine Heiligen / Psalm. 34. v. 10.  
Vnd betet mit David: Ach HErr / straffe vns nicht in deinem  
Zorn / vnd züchtige vns nicht in deinem Grimm / Psal. 38. v. 3.  
mit Jeremia Cap. 31. v. 18. Bekehre mich du / so werde ich be-  
kehret / denn du bist mein Gott / da ich bekehret ward / thet ich  
Busse / denn nach dem ich gewikiget bin / schlage ich mich auff  
die Hüfte O bone D E V S, hie ure, hie seca, hie punge, hie  
tunde, modo in æternum parce:

Soll ja so seyn /  
Daß Straff vnd Pein /  
Auff Sünde folgen müssen /  
So fahr hie fort /  
Vnd schone dort /  
Vnd laß mich ja wol büßen.

Nun wolan / der H E R R hats gegeben / der H E R R  
hats genommen / der Nahme des HErrn sey gelobet / heut vnd  
in alle Ewigkeit / Amen / Amen.

E N D E.

D. iij

Ach





**A**CH GOTT vnd HERR / Wie groß  
vnd schwer / Seynd mein begangene  
Sünden / Da ist niemand / Der helffen  
kan / Auff dieser Welt zu finden.

Tieff ich gleich weit / Zu solcher Zeit / biß  
an der Welte Ende / Vnd wolte loß seyn /  
Des Creuzes mein / Würd ich doch sol-  
ches nicht wenden.

Zu dir fliehe ich / Verstosse mich nicht /  
Wie ichs wol hab verdienet / Ach GOTT  
zürne nicht / Gehe nicht ins Gericht / Dein  
Sohn hat mich verschonet.

Sols ja so seyn / Das Straff vnd Pein /  
Auff Sünde folgen müssen / So fahr hier  
fort / Vnd schone dort / Vnd laß mich ja  
wol büßen.

Gib HERR Gedult / Vergiß der  
Schuld / Verley ein gehorsam Herze /  
Laß



Laß mich nur nicht / Wie es wol ge-  
schicht / Mein Heyl murrend verscher-  
ken.

Handel mit mir / Wie es dünckt dir /  
Nach deiner Gnade wil ichs leiden /  
Laß mich nur nicht / Dort ewig-  
lich / Von dir seyn abge-  
scheiden.











Inches 1 2 3 4 5 6 7 8  
Centimetres 1 2 3 4 5 6 7 8 9 10 11 12 13 14 15 16 17 18 19

**KODAK Color Control Patches**

© The Tiffen Company, 2000

**Kodak**  
LICENSED PRODUCT

Blue Cyan Green Yellow Red Magenta White 3/Color Black

men  
Bew  
wo  
Beho  
7 O  
der h  
sore

culari-  
314  
R E,  
Profes-  
en=  
sa-  
chem  
suchet  
in der